

Leetal ya eepoñee ya Filemon **Filemon** **Waah wa weeyem wa ti leetal** **eyye**

Aluu pakanam ti káyinan keeyemaam ka ti káasiitan, inci kicanaa.

Leetal eyya nuuyemaa ya fiye ti káasiitan, Póol akiice yo. Póol apoñapoñ a ati Eenucee ya, Yéesu Krista. Naakiic yo ti akee áyiin, aña nkasok Filemon, áyiin eetaake, náayemi ti canku ya eeyem ya ti saatee ya eti Kolos. Póol naakiic leetal eyye, kamma akee áyiin aña nkasok Onesim, eeyem amiikan ati Filemon, pale naatey.

Onesim, ta naateye ta, hikee hinoom naakaay pati Póol, pati núkuluma ya. Póol naakalanjanoo kiti hilim ha hiti Pútuun pa, náayinan. Ti leetal eyye, Póol naalum Filemon, aponket Onesim, naacokoo samat nii áwiyo ti káyinan.

Leetal eyye néeyisan sempe sa seeyem sa ti ekoonan ya éesuume ya eti Yéesu Krista siti kayesan elon an, samat nii Onesim elonoo fa neeyesane fa. Póol naasok púcook pa, Onesim ataakut nafaa, pale fiye ataakaataak nafaa náayemi lombo áwiyi ti káyinan ka kiti Ateeteyo, samat nii fa caacaw ca citi Onesim inciye fa, “Eetaake nafaa”.

Alaapalaka ti káasiitan ka kitaaluu. Alímaati Pútuun pa púwiiniyan saan unaa mpípankin

kunuu unaa kati úyiniyaa kasayan hilim etempo ti caacaw Añii etempo Yéesu Krista. Amíini.

Kakican ka

^I Inci Póol, eekulee ya ti núkuluma kamma Yéesu Eenucee ya, inci kiice leetal eyye. Inci nin Timote, an unaa ti káyinan, ukicanuu, awe Filemon, áwii unii nin áhinool unii.

^{II} Nuukican lombo kéeyinane ka ti Yéesu Krista payenka nkaconcoolo ka lati ekumpaan ya etii, nin ahoop unaa Afiya, nin Aakip, áwii unaa ti pítaakool pa piti káatuunan ka kiti ekoonan ya éesuume ya.

^{III} Alímaati Pútuun pa paapaa ya ati unaa nin Ateeteyo Yéesu Krista kasampan aluu nkawufan aluu kásuumaay.

Kalum nin hisoku Pútuun pa apalaka

^{IV} Filemon, tan óo tan ta inci iyyeniye kaluum kitii, insoksok Pútuun pa piti unaa apalaka.

^V Kaatuko inci síyaasi fa állafiye fa keesampanee ka púloon pakati Pútuun pa, nin káyinan enka antaake ka ti Ateeteyo Yéesu.

^{VI} Inci oopa ti kaluum Pútuun pa, ancuk pucokool empa nuucokoolaa pa ti káyinan, kati píhini áapimeyi pihan toko heenape ha púloon eeha nuutaakaa ha ti elon ya eti unaa nin Eenucee ya.

^{VII} Awíyam ti káyinan, pálafi pa pitii puwufanaamufan pásuuma penfakat nin páhaañi, kamma állafiye keesampanee ka pakati Pútuun pa, apan immonan lombo saanii.

Póol kaluum ka kiteyoo Filemon kiti Onesim

VIII Ooto hoonool inci iyyemuu ti kaluum. Kamma nuuyemaa pakoonool nin Eenucee ya ati Pútuun pa, ekina ewune inci intaak sempe siti hisokuyi eeha aññañe íhinu.

IX Pale kamma pálaŋi, inci puluumi. Inci Póol, eemaamane, apan íyyemi fiye ti núkuluma kamma Yéesu Eenucee ya.

X Inci oopa ti kaluumi kiti Onesim, éeyenoonii ya añiinam inci ti núkuluma.

XI Ataakut hínum ti awe nafaa,* pale fiye ataakaataak nafaa ti inci nin awe.

XII Fiye, háati fa naayem fa yaanam, inci oopa ti éñahaniyoo puu ti awe.

XIII Inci láfiyoolafi hicoku pukolam kati ayankananam ti caacawi le ti núkuluma enne inci iyyem ne tenno kamma ekoonan ya éesuume ya.

XIV Pale inci láfiit íhinu waah taamanta aasokutam iyyoo. Inci láfiiti hítku áapihinam waah weenape, láfilafi áapihin wo ti pásuumayi.

XV Pikee pa Onesim ákatinoolee-kátinool nin awe ti caanak ceetama, ancuk kati áñhoonii puu ti awe fo cancowiyaaw.

XVI Kaatuko fiye aneetaat amiikan lamma, pale ahañaañ amiikan, akina an unaa ti káyinan, apan an óo an álafiyoo. Ti inci áwiyam aña inci íllaŋiye, pale ti awe ahañaañ áwii, akina áwiyi an nin ani ti Ateeteyo.

XVII Páawoo aacokaamcok nii áwiyi, wananoo pinap samat nii fa aafawananam fa.

* **I:XI 1:11** Ti kan ya eti Kilek, “Onesim”, ekina eyem “nafaa”.

XVIII Niŋ áhinuuhin heenaput, niŋ fotom naayekani nikopu, nanf no ti inci.

XIX Inci Póol yem le ti hikiicu niŋ epeesam, inci facooyi. (Etínawunani nii awe faŋi, aayekanaam-yekan elonji.)

XX Ee, awe anam ti káyinan, káluma hín waah weetaake nafaa ti inci kamma Ateeteyo, monan yaanam ti Eenucee ya.

XXI Híiniyaamhiini nii, fa inci iyyemuu fa fiye ti hikiicu, áafahin eeha inci insokuu ha, ímmeyi lombo nii áafahin pihan eehe.

XXII Memanoolam lombo ékaap, kaatuko inci taakaataak cíki nii Pútuun pa efipisayan kaluum ka kiti aluu, mpíhinam púñoohonii puu ti aluu.

Kakican kikelan

XXIII Epafulas, eeyem ya niŋ inci ti núkuluma kamma Yéesu Eenucee ya, akicanuu.

XXIV Pákawiyam píhina Mark, Alistaak, Temas niŋ Luk, kakicanuu lombo.

XXV Alímaati Ateeteyo Yéesu Krista asampan kunuu aluu.

Kuloonaay
Karon: Kuloonaay (Portions)

copyright © 2018-2025 Wycliffe Bible Translators, Inc.

Language: Karon

Contributor: SIL International (in Africa)

All rights reserved.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

404e2c05-c6eb-5f56-8cae-50a5b595ef9a